

## *Druga međunarodna konferencija „Multidisciplinarni pristupi u edukaciji i rehabilitaciji”*

Selmir HADŽIĆ\*

*Udruženje defektologa, edukatora-rehabilitatora „STOL”, Sarajevo,  
Bosna i Hercegovina*

U periodu od 5.4. do 7.4. 2019. godine u organizaciji Udruženja defektologa, edukatora-rahebitatora „STOL” a u saradnji sa Pedagoškim fakultetom Univerziteta u Sarajevu održana je Druga međunarodna konferencija pod nazivom „Multidisciplinarni pristupi u edukaciji i rehabilitaciji”.

Na ovom stručno-naučnom skupu učešće je uzelo preko 250 profesionalaca iz oblasti specijalne edukacije (defektologije), obrazovanja, zdravstva, socijalne zaštite i drugih oblasti. Učesnici su došli iz šest zemalja, sa 11 univerziteta, iz preko 35 specijalnih ustanova, zatim velikog broja redovnih škola, zdravstvenih ustanova, ustanova socijalne zaštite i drugih.

Uvodna predavanja održali su prof. dr Jasna Bajraktarević (Pedagoški fakultet Sarajevo), prof. dr Nenad Glumbić (Fakultet za specijalnu edukaciju i rehabilitaciju Beograd) i prof. dr Osman Sinanović (Medicinski fakultet Tuzla).

U tri dana konferencije predstavljeno je 90 naučnih, stručnih i istraživačkih radova u okviru više različitih sesija te su realizirane tri radionice. U okviru različitih aktivnosti koje su realizirane na konferenciji, prezentirani su novi naučni modeli, iskustva iz prakse, izazovi i prepreke sa kojima se suočavaju stručnjaci i sistem u cjelini kako u Bosni i Hercegovini tako i u svim zemljama učesnicima skupa.

Radovi su obrađivali teme od rane intervencije, edukacije i rehabilitacije kroz osnovnu i srednju školu, inkluzije, pa sve do transformacije ustanova i prezentacije različitih modela sistemskog uređenja u zemljama regiona i Evrope. Ova konferencija je i nastavak kontinirane i dobre saradnje koju imaju strukovna udruženja iz oblasti specijalne edukacije iz Bosne i Hercegovine, Hrvatske, Makedonije, Srbije, Crne Gore i Slovenije, a koja pored potpisanog

\* Selmir Hadžić, [udruzenjedefektologaks@yahoo.com](mailto:udruzenjedefektologaks@yahoo.com)

sporazuma definisane saradnje u različitim aktivnostima, imaju tendenciju učešća na svim sličnim skupovima koje organizuju udruženja domaćini.

Na otvorenju konferencije učesnicima su se obratili: mr Zineta Bogunić, ministrica – Ministarstvo za obrazovanje, nauku i mlade Kantona Sarajevo, Malik Garibija, ministar – Ministarstvo za rad, socijalnu politiku, raseljena lica i izbjeglice Kantona Sarajevo, prof. dr Fatih Destović, dekan – Pedagoški fakultet Univerziteta u Sarajevu, Siniša Ranković – predsjednik Društva defektologa Srbije, prof. dr Slavica Golubović – predstavnik Fakulteta za specijalnu edukaciju i rehabilitaciju Beograd, prof. dr Sadeta Zečić – Pedagoški fakultet Univerziteta u Sarajevu i mr Selmir Hadžić – predsjednik Udruženja defektologa, edukatora-rehabilitatora „STOL”.

Svi gosti i učesnici istakli su veliki značaj ovog događaja koji ima za cilj da kroz stručni i naučni pristup prikaže sve izazove u oblasti edukacije i rehabilitacije djece s teškoćama u razvoju i socijalne inkluzije odraslih osoba sa invaliditetom te da zajednički kroz multidisciplinarni pristup daju svoje viđenje prijedloga unapređenja ove oblasti u društvu. Također, razmjena iskustva, primjeri iz prakse, nova naučna dostignuća, objedinjavanje više oblasti u okviru jednog skupa, učešće velikog broja učesnika iz svih zemlja regiona, samo su neke od specifičnosti ovog jedinstvenog skupa koji je od velike važnosti za defektološku struku u našoj zemlji.

U toku konferencije organiziran je veliki broj aktivnosti kao što je prezentacija specijalnih ustanova, didaktičkog materijala, udžbenika, opreme za asistivnu tehnologiju i sl.

Važno je istaći da je ova konferencija jedinstven skup u Bosni i Hercegovini koji okuplja stručnjake iz oblasti specijalne edukacije (defektologije) sa tendencijom da postane regionalno prepoznatljiv skup koji će nuditi kvalitetne mogućnosti unapređenja ove nauke.